

Après le discours de ce Capitaine, l'un de ses gens vint trouver le Père en particulier, pour se faire plus pleinement instruire: Le Père luy ayant expliqué à diverses fois une bonne partie de nostre créance: ce bon-homme le pria à son départ, de luy donner un chappellet, & une Image, devant laquelle il pût faire ses prières: De plus, il luy demanda un papier où les prières qu'il devoit faire, fussent écrites: Le Père voyant la naïveté de ce bon-homme, luy accorda tout ce qu'il demandoit; encor bien qu'il n'ignorast pas, que ce pauvre Sauvage ne sçauoit pas lire: mais assés souuent ils prennent leurs papiers, & les présentent à Dieu, & luy disent: J'ay enuie de te dire tout ce qui est là dedans, si ie le sçauois, ie te le dirois tout au long. A quelques mois de là, ce bon-homme estant de retour, vint voir le Père, luy présente l'image qu'il luy auoit donnée: [119] Elle n'est pas si blanche, dit-il, que lors que ie la receu de ta main, c'est la fumée de la cabane, qui l'a noircie, ie la tirois tous les iours de mon sac, ie l'attachois à ma cabane, & ma femme & moy, & toute ma famille, nous nous mettions à genoux pour faire nos prières soir & matin. Je disois souuent à ma femme, Je suis bien fâché de ce que ie ne sçay pas tout ce qu'il faut dire, à nostre Père qui a fait le ciel & la terre: Je n'ay point d'esprit, tu me ferois grand plaisir, disoit-il au Père Buteux, si tu me donnois le moyen d'en auoir, & si tu m'enseignois la façon de bien retenir toutes les prières qu'il faut faire à Dieu, prends courage, enseigne moy tous les iours pendant que ie feray auprès de vous; ne me parle point d'autre chose que de mon salut; c'est cela que ie veux sçauoir, ce feu qui est là bas, est bien à craindre,